



# S E R M O N

## SECOND SVR HEBR.

CHAP. VII. VERS. II.

2. *Et premierement est interpreté Roy de iustice, & puis aussi Roy de Salem, c'est à dire Roy de paix.*

**D**IE V voulant en cét vniuers représenter aux hommes ses perfections, a employé, non vne ou deux creatures, mais plusieurs : pource que chacune, à cause de sa petitesse, ne pouuoit estre vne suffisante image des infinies perfections de sa Diuinité. De mesme voulant en l'ancien Testament représenter les perfections & la condition du Mediateur, il a employé plusieurs personnages de qualitez & conditions tres-differentes: afin qu'ils fussent, en leur assemblage, vne plus parfaite figure des diuerses perfections du Mediateur. Suiuant cela nous assemblons les Rois & les Sa-

crificateurs, & les Prophetes, & tous les liberateurs du peuple d'Israël; pour en eux tous considerer le pourtraict des charges & des vertus de Iesus Christ. Et derechef, tout de mesmes qu'entre les creatures, il y en a certaines, et quelles les vertus de Dieu reluisent beaucoup plus qu'en d'autres: (comme pour exemple, Dieu a mis le Soleil pour faire voir plus particulièrement qu'és autres creatures les merueilles de ses perfections) Ainsi, entre les grands personages de l'ancien Testament, il y en a quelques-vns que Dieu a donné pour estre figures du Messie beaucoup plus eminentes que d'autres, & qui rassemblent en eux beaucoup plus de rayõs des qualitez de Iesus Christ que les autres. Tel est Melchisedech, qui auoit les qualitez de Roy & Sacrificateur, lesquelles estoient separées és autres; &, outre ce, estoit representé comme eternal, sans pere, sans mere, sans genealogie, sans commencement de vie, & sans fin de iours, & comme ayant beny Abraham, & receu de luy la disme en qualité de Sacrificateur.

C'est pourquoy nostre Apostre insiste longuement sur ce Melchisedech en cette

Epistre aux Hebreux. Or dernièrement nous vous exposâmes déjà à quel esgard Melchisedech est dit estre sans pere, sans mere, sans genealogie, sans cōmencemēt de vie, & sans fin de iours: surquoy vous auez à vous ramenteuoir, que Dieu a voulu que nous eussions des figures de Iesus Christ en toutes choses, à sçauoir non seulement en ses charges de Roy, Sacrificateur & Prophete, mais aussi es qualitez selon lesquelles il exerce ses charges: Or que les Sacrificateurs de la loy representoient bien Iesus Christ comme Sacrificateur, mais non comme eternal Sacrificateur: & que partant Dieu auoit voulu, pour la plenitude des figures, qu'il y eust quelque ombre & quelque figure de cette eternité.

Vous ayans donc exposé le type & figure de Melchisedech à raison de l'eternité de la sacrificature. Nous auons à considerer les autres parties de ce type, & les autres traits & lineamens de l'image de Iesus Christ le Mediateur: A sçauoir premierement, que Melchisedech estoit Roy & Sacrificateur tout ensemble. Secondement, qu'il estoit Roy de iustice & Roy de paix.

## I. POINCT.

Cette premiere condition d'estre Roy & Sacrificateur tout ensemble, seruoit grandement au but & dessein de l'Apostre. Car cette dispute de l'Apostre estant contre les Iuifs, qui pretendoient que la Sacrificature Leuitique demeurast à iamais, le fondement de l'Apostre estoit que ce qui estoit moins parfait & moins excellent, deuoit ceder & faire place à ce qui estoit plus parfait & plus excellent. Or si la sacrificature selon l'ordre de Melchisedech estoit vne Sacrificature & vne Royauté tout ensemble, elle estoit sans doute plus excellente que la Leuitique, qui estoit separée de la Royauté: & par consequent il falloit que la Sacrificature Leuitique prist fin à la venuë de la sacrificature du Messie, laquelle estoit selon l'ordre de Melchisedech; pourtant il nous faut considerer deux choses: l'vne, pourquoy la Sacrificature & la Royauté auoient esté separées en l'ancien Testament: & l'autre, pourquoy elles ont deu estre iointes en Iesus Christ.

Les deux charges de Royauté & de Sa-

crificature, en soy, n'ont rien d'incompatible. Le dy en soy : Car au contraire, quant aux Rois, comme ils regnent de par Dieu, & sont Seruiteurs de Dieu, il leur est conuenable d'estre les premiers à rendre à Dieu le seruice qu'il a requis des hommes: ayans le plus receu, & estās les premiers exemples de la beneficence de Dieu enuers les hommes, il est conuenable qu'ils soient aussi les premiers en la recognoissance: ayans esté les plus honorez de Dieu, il est bien seant qu'ils soient aussi les premiers à l'honorer. Et quant à Dieu, Dieu est d'autant plus glorifié par le seruice des Rois, qu'ils sont esleuez par dessus les hommes. Car n'y ayant aucune puissance en la Terre, qui leur puisse donner loy & resister à leurs volonte; Dieu est souuerainement honoré, quand estans-employez à son seruice, eux mesmes recognoissent qu'il ya vn Roy des Rois, duquel ils reçoient la loy. Aussi, anciennement le chef de famille, qui estoit comme le Prince & Roy de sa posterité, offroit les Sacrifices à Dieu & faisoit le seruice Diuin. Vous le voyez en Noé; en Abraham, en Iob; Et, entre les Payens, les anciens Roys des Spartes,

auoient conjointement la charge de la guerre & du seruice Diuin : & entre les Romains, les Preteurs, & Consuls, ont esté conjointement faitts souuerains Pontifes, c'est à dire chefs de la Sacrificature & du seruice Diuin.

Or encor que ces deux charges n'ayent rien d'incompatible, à les considerer en elles mesmes; neantmoins, à cause de l'infirmité de l'esprit humain, il a esté expedient de les separer; ainsi que Dieu a fait en sa loy, ayant donné la Royauté à la tribu de Iuda, & la Sacrificature à celle de Leui. L'vne & l'autre ayant esté ostée à Ruben, qui autrement, comme premier né d'Israël, les eust possedées & deriuées de soy à sa posterité. La raison doncques de la separation de ces charges, est, qu'estans si penibles, elles requeroient chascune vn homme tout entier: les forces de l'esprit humain estans trop petites pour ces deux fardeaux ensemble. Mais il y a eu aussi du mystere en la separation qui a esté faite de la Royauté & de la Sacrificature en l'ancien Testamēt: A sçauoir premieremēt, en ce que le corps des Sacrificateurs Leuitiques representoit en general le corps des fideles: & specialement le

corps des Ministres de l'Euangile, dont la cōdition est de ne point dominer en la terre, mais d'obeir & estre subjects aux Princes & Magistrats ; selon que dit l'Apôstre escriuant à l'Eglise de Rome, *Toute ame soit sujette aux puissances Superieures.* L'Eglise est icy bas en la condition de Iesus Christ qui a payé le tribut à Cesar, & a comparu deuant le Tribunal de Pilate qui estoit Lieutenant de l'Empereur Romain. Dont aussi Iesus Christ opposant la condition de ses Disciples à celle des Roys & des Princes, & ayant dit que les Rois des nations les maistrifent, & vsent d'authorité sur elles, adjouste qu'il n'en seroit pas ainsi entr'eux, Ains que quiconque voudroit estre grand entr'eux, fust leur seruiteur : & fonde cela sur l'exemple de sa condition en la terre, disant que le fils de l'homme n'est point venu pour estre seruy, mais pour seruir. Tres à propos donc Dieu a voulu que la Tribu de Leui, ayant la sacrificature n'eust point la Royauté & Domination: pour monstrier que son Eglise, qui est le corps de ses Leuites, doit estre sujette aux dominations ciuiles: selon que dit saint Pierre au 2. de sa 1<sup>re</sup>. *Rendez-vous*

*subjects à tout ordre humain, pour l'amour de Dieu: soit au Roy, cōme à celuy qui est par dessus les autres, soit aux Gouverneurs, comme à ceux qui sont enuoyez de par luy.* Secondement, la separation de la Royauté d'avec la sacrificature, estoit pour monstrier que la gloire du monde & l'estat de la sanctification, sont choses le plus souvent separées. Les richesses & les honneurs du siecle logent ordinairement ailleurs que là où loge la pieté. Iesus Christ plante ordinairement sa croix, c'est à dire la pauvreté & le mespris du monde, là où il plante son Euangile. Vous estes, disoit l'Apostre I. Cor. I. peu de forts, & peu de nobles: Car Dieu a choisi les choses foibles de ce monde, les mesprisées, voire celles qui ne sont point, afin d'abolir celles qui sont. D'abondant, bien qu'il y ait des Rois fideles, & craignans Dieu, & des grands seigneurs exēples de pieté; neantmoins on est la sacrificature de Dieu, c'est à dire membre de son Eglise, par des qualitez, esquelles le Prince n'a point de prerogatiue par dessus le subjer, ny le riche par dessus le pauvre, ny le grand par dessus le petit. Les qualitez & dignitez mondaines sont choses de de-  
hors

hors, par lesquelles on n'est pas privilégié deuant le Tribunal de Dieu. *Il n'y a en Iesus Christ, dit l'Apostre, ny serf, ny franc, & par consequent, ny seigneur, ny seruiteur, ny riche, ny pauure, mais la nouvelle creature.* Voila quant à la separation de la Royauté & de la sacrificature en Israël. Et vous sçauiez que la separation en estoit telle, que Hozia Roy de Iuda fut frappé de lepre pour auoir voulu mettre la main à l'encensoir, ce qui n'appartenoit de faire sinon aux Sacrificateurs.

2. Chron.  
ch. 26.

Mais au Messie la Royauté & la Sacrificature deuoient estre iointes : *Voicy l'homme, auoit-il esté dit Zach. 13. duquel le Nom est germe, qui germuera de dessous soy, & rebastira le Temple de l'Eternel, & sera remply de Majesté, & sera assis & dominera sur son Thrône, & sera Sacrificateur, estant sur son Thrône.* Et Pseaume 110. Dieu ayât dit au Messie, *Tu es Sacrificateur eternellement à la façon de Melchisedech, le Prophete adjouste, Dieu transmettra de Sion le sceptre de sa force, disant, seigneurie au milieu de ses ennemis.* En ce Messie, qui est le Fils de Dieu, ne se trouue point l'infirmité qui empeschoit és hommes l'exercice de ces deux charges de Roy & de

Sacrificateur. Christ peut tres-bien auoir l'empire sur son espaule, & en mesme temps estre Sacrificateur, & interceder pour nous deuant la face de Dieu. Dieu ne luy a point donné son Esprit par mesure: il fera tres-parfaitement en mesme temps toutes ses fonctions. Il est vray que pendant que Iesus Christ a esté en la terre, il n'a point exercé la qualité de Roy, mais bien qu'il fust Fils du Roy des Rois, il a payé le tribut. Car ç'a esté par son ascension au Ciel que Dieu l'a estably sur son Thrône, & a mis toutes choses sous ses pieds. Pour nous monstrier que son Eglise doit estre sujette, pendant qu'elle est en la terre, à tout ordre politique; & que quand elle sera esleuée au Ciel, elle regnera avec Iesus Christ, & sera assise avec luy en son Thrône.

Or il a fallu que le Mediateur fust Roy & Sacrificateur tout ensemble selon l'ordre de Melchisedech, pour trois raisons: A sçauoir, premierement, pour pouuoir, comme Roy, introduire au Ciel & garantir de tous maux, ceux dont il auroit expié les pechez, comme Sacrificateur. Car que nous eust seruy d'auoir esté reconciliez à Dieu par son sacrifice,

Si, apres, nous eussions esté vaincus & opprimez par les tentations & les efforts de Sathan & du monde: Il falloit d'oc en ce Messie deux choses, vne oblation & sacrifice qui nous sanctifiast à Dieu: Et vne puissance & autorité qui nous deliurast de tous nos ennemis. Par ce moyen la charge de Roy, iointe à celle de Sacrificateur, nous assure de nostre protection, & nous donne certitude de nostre perseverāce en la grace de Dieu & au salut qui nous a esté acquis. Car voicy vn Sacrificateur qui est Roy, reuestu de puissance, pour nous conduire à bras estendu & main forte au Royaume des Cieux: afin qu'estans deliurez de la crainte de nos ennemis, nous luy seruions sans crainte en sainteté & iustice, tous les iours de nostre vie. Secondement, il falloit que le Mediateur, non seulement expiast nos pechez, & nous déchargeast de la peine que nous auions meritée; mais aussi qu'il nous enrichist de ses dons, & nous reuestist de sa gloire. Or comme le premier estoit l'acte d'un Sacrificateur, aussi le dernier estoit l'acte d'un Roy. Et pourtant voicy, Chrestiens, toute matiere de joye en Iesus Christ: puis qu'estant tout

ensemble Roy & Sacrificateur, non seulement il vous décharge de l'ire de Dieu, mais aussi vous communique vne plénitude de biens & de gloire. En troisieme lieu, il n'estoit pas conuenable qu'apres auoir esté reconciliez à Dieu, nous seruissions au peché & au monde: pource il a fallu que le Mediateur expiant nos pechez, fust Roy, pour nous assujettir à ses commandemens en toute iustice & sainteté: selon que dit l'Apostre Rom. 6. qu'ayans esté affranchis de peché, nous auõs esté faits serfs à justice: & que le peché ne doit plus regner en nostre corps mortel. Toy donc qui veux bien receuoir Iesus Christ pour Sacrificateur qui te reconcilie à Dieu, reçois le aussi comme Roy, à qui tu serues & obeisses: toy qui reçois le merite de son sang, pour la remission de tes pechez, reçois aussi ses loix par le renoncement à tes conuoitises. Considere que tu n'es plus à toy-mesme: que celuy qui t'a racheté par son sacrifice, t'a acquis comme Roy, afin que tu le serues & glorifies. Pourquoi partages-tu en Iesus Christ ce que Dieu a conjoint? Ceux qui auoient les fils d'Aaron pour Sacrificateurs, ser-

uoient à d'autres qui estoient leurs Seigneurs & leurs Rois. Mais cettui-cy est comme Melchisedech, tout ensemble Sacrificateur & Roy : de sorte que tu ne peux seruir à vn autre.

## II. POINCT.

Voyons maintenant les deux qualitez de son regne, la Iustice & la Paix. *Ce Melchisedech, dit l'Apostre, premierement est interpreté Roy de Iustice, puis aussi Roy de Salem, c'est à dire Roy de Paix* C'est que ce mot *Melchisedech* est composé de deux, dont l'vn signifie *Roy*, & l'autre *iustice*: cōme aussi ce mot de *Salem* signifie *Paix*. Premierement donc Melchisedech est vray type & figure du Messie, qui, par excellence, est Roy de Iustice, & est proposé comme tel par les Prophetes. Zach. ch. 9. *Esgaye toy grandement, fille de Sion, jette cris d'esionissance, fille de Ierusalem, voicy ton Roy viendra à toy Iuste.* Ieremie 23. *Voicy les iours viennent, dit l'Eternel, que ie feray leuer à Dauid vn germe iuste, & il regnera comme Roy & , exercera iugement & iustice en la terre.* Ps. 45. *Ton Throne, ô Dieu, est à tousjours & à perpetuité: & le sceptre de ton regne est vn sceptre d'e-*

*quitte: tu aimes iustice & hais meschanceté; pour ce, ô Dieu, ton Dieu t'a oint d'huile de lieffe par dessus tes compagnons. Et Ps. 97. est dit que iustice & iugement sont l'assiette de son Thrône. Or cela est dit non seulement à l'opposite des Rois d'Israël & de Iuda, que les Prophetes auoient redargué de beaucoup d'injustice: mais en general à l'opposite du regne que le peché, depuis Adam, a eu sur les hommes. Car il falloit (selon qu'en parle l'Apostre Rom. 5.) que comme le peché auoit regné à mort, aussi la grace regnast par iustice à vie éternelle par Iesus Christ nostre Seigneur. Or pour entendre en son entier comment Iesus Christ est Roy de Iustice, considerez ce Roy en soy, & enuers ses sujets. En soy, il est voirement Roy de Iustice: puis que, comme Dieu, il est la Iustice mesme: & comme homme, il a esté conçu du S. Esprit, afin d'estre exempt de tout peché. Enuers les hommes il est Roy de Iustice, premierement entât qu'il iustifie par son sang tous ceux qui croyent en luy, selon qu'il est dit 2. Cor. 5. Qu'il a esté fait peché pour nous, afin que nous fussions *iustice de Dieu en luy.* Et Rom. 5. que par son obeïssance*

nous sommes constituez iustes: Dieu l'a ordonné, dit l'Apostre Rom. 3. pour propitiatoire, par la foy en son sang: afin de demonst<sup>r</sup>er sa iustice, & afin qu'il soit trouuë iuste & iustificans celuy qui est de la foy de Iesus. O Chrestieñ, qui souüpires pour tes pechez, voy que tu es däs vn regne, où Dieu exerce sa iustice, en iustificans les pecheurs repëtans. Es Royaumes de la terre, la repentance n'absout point les criminels; mais icy, si tu frappes ta poitrine, comme le pauvre Peager, disant, à Dieu sois propice à moy qui suis pecheur; tu descendras iustificié en ta maison. Es Royaumes de la terre la iustice s'exerce ordinairement en punissant les pechez; icy, en les pardonnant: selon que dit saint Iean, Si nous confessons nos pechez, Dieu est fidele & iuste pour nous les pardonner. Et 2. Cor. 3. l'Apostre appelle l'Euangile *ministere de iustice*, c'est à dire de grace & absolution, l'opposant à la loy qu'il appelle *ministere de condamnation*. Secondement, ce Roy renouelle les cœurs des hommes en iustice & sainteté par son Esprit: selon que dit l'Apostre, que nous sommes reuestus d'un nouuel homme, qui est créé selon Dieu, en iustice & vraye sainteté. Luc 18. Ephes. 4.

*Jerem. 32.* En ce regne Dieu escrit sa loy en nos entendemens , & met sa crainte en nos cœurs , afin que nous ne nous destournions point de luy. Icy nos pensées sont amenées captiues à l'obeyssance de Christ : & nous sommes transformez par  
*Rom. 12.* le renouvellement de nos entendemens , pour esprouer quelle est la volonté de Dieu , bonne , plaisante , & parfaite. Icy on s'adonne à Iustice par amour : au lieu que communement és Royaumes de la terre c'est la terreur des Loix qui retient les hommes de mal faire. Icy les cœurs sont gagez à Dieu , & les hommes ont des desirs ardens de luy estre agreables. Es Royaumes de la terre , les richesses , les honneurs , & les plaisirs de la vie produisent tout ce qu'il y a de trouble & de maux , par l'auarice , l'ambition & autres conuoitises. En ce Royaume sont presentées des richesses spirituelles , des dignitez celestes , & vne felicité eternelle , qui esteignent dans les cœurs le feu de l'auarice , de l'ambition , & des voluptez charnelles. Aussi l'Euangile qui presente ces biens est le sceptre du Royaume de Iesus Christ , comme estant la puissance de Dieu en salut à tous croyans. Venez

doncques vous tous, qui vous dites estre au Royaume de Christ, monstrez par toutes vertus Chrestiennes, le pouuoir que son sceptre a sur vous. Sçache, ô fidele, que ce que Dauid promet à Dieu touchant l'estat de sa maison, quand Dieu l'auroit rendu Roy paisible, est l'image de ce qui a lieu en la maison & en la jurisdiction du Christ, *Le cœur peruers se retirera d'aupres de moy, ie n'aduouëray point le malin: Celuy qui detraicte en secret de son prochain, ie le retrancheray: celui qui a les yeux esleuez, & le cœur gros, ie ne le pourray souffrir. Je prendray garde aux gens de bien du pays, afin qu'ils demeurent avec moy: celui qui chemine en la voye entiere me seruira. Celuy qui usera de fallace ne demeurera point en ma maison: celui qui profere mensonge ne sera point affermy deuant moy. Je retrancheray de bon matin tous les meschans du pays, afin d'exterminer de la Cité de l'Eternel tous ouuriers d'iniquité.* I'aduotie que ce Roy iustifie & absout, mais c'est les pecheurs repentans qui ne retournent plus à leurs iniquitez. Car il a ses yeux trop nets, & a trop en haine l'injustice & l'iniquité, pour la souffrir. Il faut donc, ô homme, que si tu es entré en la Sion, qui est son Royaume &

Ps. 101

son Estat, tu ayes desormais les mains pures & le cœur net.

Mais il nous faut encor considerer la Iustice de ce Roy en toute son administration & conduite enuers nous; à sçauoir és compassions qu'il a des pauures & affligez: Car c'est la frequente signification du mot de Iustice és Escritures, à sçauoir de signifier benignité, charité, beneficence, & misericorde: Auquel sens l'aumosne est appellée Iustice: & le mot de *Iuste* pris pour le mot de misericordieux & pitoyable: selon que cela se voit ps. 112. où le Prophete dit, *Il a espars & a donné aux pauures, sa Iustice demeure à perpetuité. Il est pitoyable, misericordieux & iuste.* En ce sens le Prophete Ps. 51. demandant à Dieu pardon de ses pechez, promet que quant il l'aura receu, ses leures annonceront *la Iustice de Dieu*; c'est à dire sa bonté & misericorde: & Ps. 36. il prend iustice & gratuité pour mesme chose, disant, *Poursuy à desployer ta gratuité sur ceux qui te cognoissent, & ta iustice sur ceux qui sont droictz de cœur.* Et c'est en ce sens qu'est prise la Iustice, Ps. 72. où il est parlé du regne de Christ, sous la figure de celui de Salomon, & où l'Eglise dit,

à Dieu donne tes iugemens au Roy & ta justice au Fils du Roy: Car il y a en suite, qu'il iuge ton peuple iustement, & equitablement, ceux des tiens qui seront affligez: que les montagnes portent la paix pour le peuple, & les costaux la justice: qu'il face droict aux affligez d'entre le peuple, qu'il deliure les enfans du souffreteux: & apres, Il deliurera le souffreteux criant à luy, & l'affligé, & celui qui n'a personne qui l'aide: il aura compassion du chetif, & du souffreteux, il garantira leur ame du dol, & de la violence, & leur sang sera precieux deuant les yeux d'iceluy. Vous donc, ô ames affligées, consolez-vous en la benignité de ce Roy, & en ses compassions. Venez à moy, a il-dit, vous tous qui estes chargez & trauaillez, & ie vous soulageray. Bref, considerez fideles, qu'apres que ce Roy aura ainsi exercé enuers vous sa Iustice icy bas, la felicité & la gloire qu'il vous prepare au Ciel est appelée en l'Escriture *Couronne de Iustice*, comme estant vne gratuite & misericordieuse remuneration, selon que dit l'Apostre 2. Tim. 4. *I'ay combattu le bon combat, i'ay paracheué la course, i'ay gardé la foy. Quant au reste, la Couronne de Iustice m'est reseruée, laquelle me rendra le Seigneur iuste Iuge en*

cette journée là, & non seulement à moy, mais aussi à ceux qui auront aimé son apparition.

Or tres à propos est jointe à la Justice la paix: Ce Melchisedech, Roy de Justice, estant Roy de *Salem*, c'est à dire de *Paix*. Comme aussi Pl. 85. où est parlé du Regne de ce Roy, il est dit que *Justice & Paix se sont entrebaïsees*. Et l'Apôstre Rom. 14. dit que le Royaume de Dieu est Justice & Paix. Et en l'Escriture annoncer le regne de Dieu & publier la Paix sont vne mesme chose: Cōme en Esaye 52. *Combien sont beaux sur les montaignes les pieds de celuy qui publie la Paix, qui dit à Sion, Ton Dieu regne*. Et les Anges, à la naissance de Iesus Christ, comprennent par la Paix toute la grace de Dieu enuers les hommes, disans, *Gloire soit à Dieu és Cieux tres-hauts, en terre Paix enuers les hommes*. Aussi Ierusalem qui est le nom de l'Eglise, en laquelle le Messie regne, prend son Nom de la Paix: car *Ierusalem* est à dire, *On verra la Paix*. Et certes, en ce regne, il y a Paix de toutes parts; Enuers Dieu, selon que declare Iere. ch. 32. qu'il sera appaisé enuers nos iniquitez: à sçauoir ayāt flairé du Sacrifice de Iesus Christ, vne

odeur d'apaisement ; comme cela fut figuré jadis en iceluy que Noé luy offrit pour l'appaier enuers la terre, Gen. 8. Ainsi au lieu que nous estions enfans d'ire, maintenāt nous sōmes rendus agreables à Dieu en son bien aimé, selon qu'en parle l'Apostre Eph. 1. Secondement, Paix enuers les Creatures ; Car quant aux saincts Anges, au lieu qu'ils estoient armez à l'encontre de nous, à cause de nos pechez (selon qu'il est escrit que des Cherubins avec vn glaiue flamboyant chasserent nos premiers parens du Paradis terrestre) maintenant ils se campent à l'entour de nous : & ont charge de nous porter en leurs mains, afin que nous ne heurtions cōtre la pierre. Et l'Ap. Heb. i. les appelle *Esprits administrateurs, enuoyez pour seruir, pour l'amour de ceux qui reçoient l'heritage de salut.* Et quant aux Demons, nostre Paix est vne seureté que nous auons contre tous leurs efforts : selon qu'il est escrit Rom. 8. que rien ne nous separera de la dilection de Dieu, ny mort, ny vie, ny anges, ny principau-  
tez, ny puissances, ny profondeur, ny aucune creature : & que toutes choses aident ensemble en bien à ceux qui ai-

Pf. 34.  
Pf. 91.

ment Dieu. C'est pourquoy il est dit Ps. 91. qu'aucune playe ne peut plus approcher de nostre Tabernacle: & que nous marchons sur le lionceau & sur le dragon, c'est à dire, que nous surmontons la puissance de Sathan & du monde, & en sommes plus que vainqueurs. Et c'est ce qui est dit par le Seigneur en Esa. 11. *On ne nuira point, & on ne fera aucun dommage à personne en toute la montagne de ma Sainteté.*

*Eph. 2. 3.* Paix enuers les hommes, car il n'y a

*v. 14* plus la paroy d'inimitié entre le Gentil

*18* & le Iuif. Il n'y a en Iesus Christ ny Iuif,

*Col. 3. 11* ny Grec, ny Scythe, ny Barbare: tous

sont vnis en vn corps à Dieu: tous ont en

vn mesme Esprit accez au Pere: il y a vn

*Iean 10* seul troupeau & vn seul Berger. Le loup

icy paist avec l'agneau, le leopard giste

avec le cheureau, est-il dit Esaye 11. C'est

à dire que ceux qui estoient les plus alie-

nez se prennent par la main, se disans:

*Esa. 2.* Venez, & montons en la montagne de

l'Eternel, & il nous enseignera touchant

ses voyes, & nous cheminerons en ses

sentiers. Outre cette inimitié des Iuifs

& des Gentils ostée, tous en ce regne re-

çoient vn Esprit de paix & de charité,

pour s'entr'aimer les vns les autres, com-

me Christ les a aimez, & pour supporter les vns les autres. Les argumens en sont, qu'il y a vn seul corps & vn seul esprit; comme aussi tous sont appelez en vne seule esperance de leur vocation: qu'il y a vn seul Seigneur, vne seule foy, vn seul Baptesme, vn seul Dieu, & Pere de tous, qui est sur tous & parmy tous, & en tous. C'est pourquoy l'Apotre disoit Coloss. 3.

Eph. 4.

*Que la paix de Dieu tienne le principal lieu en vos cœurs, à laquelle vous estes appelez en vn corps.* 4. Paix enuers nous-mesmes,

par deux choses, à sçauoir, par la sanctification, & par le repos & la ioye de la conscience. Le dy par la sanctification: Car l'estat de l'ame non regeneré n'est autre qu'un tumulte de conuoitises charnelles qui guerroient contre l'ame, & qui se choquent l'une l'autre; l'auarice, l'ambition, les voluptez, les vengeances, les enuies, les inimitiez, les craintes, les anxietez: Tellement que l'esprit des meschans est ainsi que la mer qui est en tourmente lors que ses eaux iettent de la bourbe & du limon, dit Esaye. Mais l'Esprit de Dieu suruenant par la regeneration & le renouvellement de l'ame, met la paix, en mortifiant les conuoitises charnelles, &

Esa. 57.  
v. 20. 21

remplissant les cœurs de son amour & de l'esperance des biens celestes. Je ioins à cela la ioye de la conscience; car estans iustifiez par foy, nous auons paix enuers Dieu par Iesus Christ nostre Seigneur: & la dilection de Dieu est espanduë en nos cœurs par le saint Esprit qui nous est donné: ainsi qu'en parle l'Apostre Rom. 5. Tellement qu'au lieu des frayeurs que la conscience nous donnoit de la malediction de Dieu, nous auons l'assurance du salut; Et nous n'auons plus vn esprit de seruitude, pour estre derechef en crainte: mais nous auons vn esprit d'adoption, par lequel nous crions Abba Pere: cét Esprit rendant tesmoignage à nos esprits, que nous sommes enfans de Dieu, heritiers de Dieu, & coheritiers de Christ. Paix par laquelle non seulement nous possedons nos ames en silence & patience dans les afflictions, mais aussi nous glorifions en l'esperance de la gloire de Dieu. Paix qui surpasse tout entendement: & à laquelle toutes les delices du monde ne sont comparables. C'est pourquoy saint Pierre dit, que croyans, nous nous esiouissons d'vne ioye inenarrable & glorieuse. Finalement, comme

Iesus

Rom. 8.

Rom. 5.  
vers. 1.1. Pier. 1.  
v. 8.

Iesus Christ establit en cette sorte la paix icybas, au milieu des combats : l'estat de la gloire future, apres ces combats acheuez, sera vne paix absoluë. Et partant icybas nous souffrons diuerses agitations du dehors: (auquel esgard Iesus Christ dit, qu'il n'est pas venu mettre la paix en la terre, mais l'espée) mais lors il n'y aura ny dueil, ny cry, ny trauail: toutes larmes seront essuyées de nos yeux: & Dieu nous rassiera de ioye en la contemplation de sa face.

Voila, mes freres, l'estenduë de la paix de nostre Christ, du vray Roy de Salem. Maintenant repassons sommairement sur les choses que nous auons proposées.

Et premieremët, Puis que Iesus Christ est Sacrificateur & Roy tout ensemble, & qu'il nous donne la Iustice & la Paix: apprenons que nous deuous nous arrester à lui, sans recourir à aucun autre: Veue que nous sommes rendus accomplis en luy: & qu'il nous est fait de par Dieu toutes choses, sapience, iustice, sanctification & redemption. Dequoy peus-tu auoir besoin, ô pecheur, que tu ne trouues en Iesus Christ, comme Sacrificateur, ou

E

comme Roy? Es-tu cõulpable deuant Dieu pour tes pechez? voicy le Sacrificateur, qui par son sacrifice les expie. Es-tu destitué des graces du sainct Esprit? voicy le Roy qui t'enrichit. Es-tu attaqué de Sathan & du monde? voicy ce Roy qui te defend puissamment, estant plus grand que tous. Tu n'as point à aller ailleurs. Car il n'a remis ny la Sacrificature, ny la Royauté à aucun autre.

Secondement, Puis que la Royauté & la Sacrificature sont iointes en Iesus Christ, cõsiderons que toute cette gloire de I. Christ nostre Chef nous est communiquée par quelque analogie: selon que dit S. Iean Apocal. i. que I. Christ nous a faits Rois & Sacrificateurs à Dieu son Pere: A sçauoir Sacrificateurs, pour offrir sacrifices spirituels, agreables à Dieu par Iesus Christ: c'est à dire nos corps en sacrifice, viuant, sainct, & plaisant: nos prieres & actions de graces: la beneficence, & les aumosnes. Rois pour regner sur le peché & ses conuoitises: & pour estre vn iour assis avec Iesus Christ en son Thrône: selon que l'Apostre dit que cette parole est certaine, que si nous mourons avec Christ, nous regnerons aussi avec

luy. C'est pourquoy saint Pierre nous appelle *la sacrificature Royale*, au 2. de sa premiere, ioignât en nous les deux qualitez de Melchisedech. Mais tout cela se dit seulement par quelque conuenance, & d'une maniere spirituelle: & non proprement d'une maniere externe: Selon laquelle l'Euesque de Rome se pretend succeder à Iesus Christ en ces deux qualitez. Ce qui ne se peut, pource que nostre Melchisedech n'a point eu de successeur. Et est necessaire pour donner lieu à cette figure, que les choses qui sont attribuées à Iesus Christ, se terminent en Iesus Christ seul, & demeurent en luy eternellement, sans passer à aucun autre. La Sacrificature Leuitique, & la Royauté de Iuda, ont eu des successeurs: celle de Melchisedech n'en peut auoir. Celuy qui l'a, demeure eternellement, pour la soutenir par soy-mesme sans qu'aucun luy succede iamais.

Et quant à ce que nous voyons iointes en Iesus Christ la justice & la paix, apprenons, mes freres, que la paix vient de la iustice: Afin que si nous voulons auoir la paix de Dieu, nous nous estudions à justice & sainteté. *Paix*, dit le Prophete

E ij

Esaye, chap. 31. *sera l'œuvre de iustice.* Et saint Iacques dit, que *le fruit de iustice se seme en paix.* Adonne toy donc, ô homme, à iustice, & tu auras paix enuers Dieu, enuers toy-mesme, enuers tes prochains. Enuers Dieu, lequel si tu renonces à tes injustices, changera son ire en benediction & paix: comme il est dit Pseaume 85. *Il parlera de paix à son peuple, moyennant qu'ils ne retournent plus à leurs folies.* Enuers toy-mesme: car *le cœur du iuste est un festin continuel.* Enuers tes prochains: Car si vous rendez à vn chacun ce qui luy appartient, avec qui aurez-vous de la discorde & du trouble? Selon que dit S. Iacques au 4. de son Epistre, D'où viennent les combats & querelles entre vous? n'est-ce point d'icy, à sçauoir des voluptez, lesquelles guerrieroient en vos membres? vous conuoitez & ne l'avez point; vous estes enuieux & jaloux, & ne pouuez obtenir; vous querelez & combattez, & n'obtenez point ce que vous desirez. Que donc cette conjoinction de iustice & de paix, nous apprenne à distinguer la paix, d'avec la securité charnelle & vn endormissement de la conscience. Car si vous vous abandonnez à vos plai-

sirs & voluptez, & ne vous effrayez point de l'ire de Dieu, ny de la mort, souuenez vous de ce que dit l'Esprit de Dieu, Lors qu'ils diront, Paix & seureté; leur arriue-ra soudaine destruction, comme le trauail à celle qui enfante. D'abondant, apprenons qu'il ne suffit pas, qu'il y ait en nous quelque iustice & quelque paix: mais qu'il faut qu'elle y regne: il faut que nous soyons faits *serfs* à iustice: & selon que disoit l'Apostre Colossiens chap. 3. que la paix de Dieu tienne le *principal lieu* en nos cœurs.

Arriere donc du regne de Iesus Christ, vous qui faites le mestier d'iniquité, Iesus Christ nostre Roy ne vous recognoist point. Arriere vous, dont le cœur n'est que haine, enuie, & la langue que calomnie & medifance; & les deportemens qu'offense, desdain & mespris de vos prochains. Pourquoi estes-vous en la Salem de Christ, si vous ne renoncez à vos haines, pour vous adonner à paix & charité fraternelle? Pourquoi combattez-vous l'Esprit de Christ, l'Esprit de dilection & de paix? Iesus Christ a presenté la paix à ses ennemis, pourquoy ne l'auiez-vous avec vos freres? Cherchez donc la paix &

la poursuiuez: car bien-heureux, dit Iesus Christ, *sont ceux qui procurent la paix, pour ce qu'ils seront appelez enfans de Dieu.* Et vous qui estes dans le regne de Iesus Christ resolu de poursuiure iustice & paix, remportez cette consolation; Que vous n'avez point à craindre la haine, l'injustice, les desordres, les esmotions, & les tumultes du monde, puis que vous estes sous la protection de Iesus Christ, le Roy de justice & de paix. Que sa justice vous console, & que sa paix vous assure: car elle gardera nos corps & nos sens. Il a protesté que quand les costaux cresseroient, & les montagnes se remueroient, sa gratuité ne se departira point de vous, & l'alliance de sa paix ne bougera point. Il vous a dit, Ie vous dōne ma paix, ie vous laisse ma paix, & ne vous la donne point cōme le monde la donne. Le monde ne la donne que par quelque prosperité exterieure & passagere: Mais outre que des maintenant Iesus Christ la dōne interieurement d'une maniere inenarrable & glorieuse: il vous recevra finalement en son Royaume celeste, où justice habite, & où vous iouïrez interieurement & exterieurement de paix & de felicité eternelle. Ainsi soit-il.